

En memoria da

27.4.85 GR

# Tina Schatz-Cavegn, Cazas

F.B. Vargada la veta d'in carstgaun, caztga ei beinduras da dar in sguard anavos per tener en memoria entgnas staziuns ord la veta dil spartiu. Tina Schatz-Cavegn ei stada ina Tujetschina da Rueras, e nus astgein se-regardar cun bien dretg en tutta creanza e pietad dalla defuncta. Tier nus eis ella ina veta ora vegnida numnada «La Tina Cavegn».

Siu bab ei staus il Giachen Fidel Cavegn dalla famiglia da Gion Antoni Cavegn. Nos vegls numnavan quels ils «gronds Cavegns». Sia mumma fuva Mariuschla Hetz, ina feglia da Gion Bistgaun Hetz, semplamein numnai ils Alexis. Quella giuvna famiglia ei secasada enagiudem il vitg en casa paterna dalla mumma. Da quella lètg ein sorti nov affons: 8 mattatschas ed in buob. Tschun da quels pignets: 4 mattatschas ed il sulet fegl ein morts da pign. Bein ina brava crusch per ils geniturs e tuttavia per la mumma. Da tuts ils affons ei la Tina stada la secunda en vegliadetgna. Il di da sia naschientscha ei stau ils 25-12-1905 per la fiesta da Nadal. Gia 1913 pauc suenter la naschientscha dil 9. affon, ei la buna mumma vegnida tschaffada d'ina maligna febra e morta en la vegliadetgna da mo 33 onns. Ussa fuva il bab persuls cun quater pintgas orfnas. La Tina veva 7 onns. Ed ussa, tgei dueva il bab pegliar a mauns?

Giachen Fidel, il bab, haveva aunc enta Rueras la famiglia da ses faragliuns dils «gronds Cavegns». Leu fu van 5 umens ed ina sora la Culastia tuts ledis, e nuot ei stau pli dau che da semetter omisduas famiglias ensemble. Aschia ha la onda Culastia priu ed acceptau igl uffeci da mumma per las quater pintgas orfnas. Mo cun la megliera bunaveglia e buontad, l'atgna mumma sa negin remplazzar. «Dieus paghi» all'onda ed a tuts per il bien fatg allas pintgas. Quellas han denton en quella famiglia e casa purila era giu dad emprender e prestar il lur. S'entelli che el temps liber e primavera e stad deva ei tier ils augs buca da far nuot, ni far vacanzas. Ils augs fuvan finadin activs sco las furmiclas, e da tuts cussadents vegneva ei pretendiu lavour entira, era dallas pintgas. Dacuort hai jeu cattau ina veglia fotografia digl erudit perscrutader da nossa natira e cultura: dr. P. Carl Hager dalla claustra da Mustér,



nua che quel ha perpetnisau la lavour d'in di dad arar cun la famiglia dils Cavegns si Plaun Sutè. Cheu catt'ins era las pintgas buobas mintgina cun in pétg a cuntschond igl èr, amiez ils dels gronds.

Dallas quater soras era bein la Tina la pli quieta. Gia da buoba fuva ella d'ina demanonza zun distinguida, quasi in tec retratga. Ses scolasts ein stai a Rueras ils emprems onns: Placi Giger (da Sontget/Mustér) e lu Barclamiu Coray, da Laax, en la scola gronda. La Tina fuva ina zun talentusa scolar, e cunzun scolast Coray ha prest enconuschi e promoviu quei talent. 1920/21 ha ella aunc frequentau la scola reala a Camischolas sut scolast secundär Sep Mudest Nay, ed essend seresolvida da serender a Cuera en el seminari da scolasts, ha ella aunc la stad sisu priu uras d'istruczziun a Danis tier quel. 1922 entupein nus la Tina el seminari a Cuera, nua ch'ella ha igl onn 1926, sco ei era da spetgar, fatg in stupent examen ed ei returnada a casa cun la patenta da scolasta.

Da quei temps deva ei denton era pli biars scolasts che scolas. En la visch-naunca havevan igl onn 1925 quater scolasts giuvens da Tujetsch finiu lur studi e vegni elegi per nossas scolas. Aschia ha la nova scolasta, schegie dada per quella clamada, stuiu encuir in auter paun. Quel ha ella anflau-

en la casa da correcziun a Realta sco survigiladra en la partizun da dun-nas. Cheu ha ella empriu d'enconuscher bia miseria e sventira dils carstgauns. Quei ei bein stau mo ina sligiazun temporara, pertgei siu element e siu giavisch fuva la scola. Gie, co fiera beinduras la sort vidaneu il carstgaun en la veta, e per pli tard vesa ed observ'ins ch'ina provedienscha ha cumpignau nus.

Cheu a Cazas ha ella era fatg enconuschienscha cun il futur cumpogn da sia veta. Igl onn 1929 han ins elegiu ella, che fuva era egl jester adina restada attaschada alla patria tuje-tschina, scolasta per la scola entira (8 classas) a Selva. Cun tgei plascher vegn ella bein a haver entschiet a dar scola, quei fuva quei ch'ella haveva adina giavischau, per dar vinavon siu saver als auters.

Igl onn 1933 ha il giuven Fidel Schatz, da Cazas, dumandau per siu maun, ed els han serrau la ligia per la veta ils 11 da matg da quei onn, en la baselgia claustral a Nossadunnaun e priu dimora a Cazas. Da quella lètg ein sorti 7 affons: 4 mattatschas e 3 buobs. Il giuven da quels ei denton gia morts tier la naschientscha. Aschia ha nossa defuncta giu lavour e braha per sia famiglia, ed a quella eis ella sededicada cun premura e carezia. Segir vegn quella ad esser stada siu pli grond bein sin quest mund.

Alla scola eis ella denton aunc adina stada attaschada. Aschia ha ella gida ora per temps scolasts da Cazas (substituziun) e suenter 3 onns a Cavor-gia/Tujetsch e Rueras 2 onns, leu en sia pli stretga patria. Forsa seregora in ni l'auter da ses scolars cun in patratg d'engrazievladad da sia ante-riura scolasta.

Suenter che siu mariu Fidel ei staus pensiunaus eis ella sededicada alla tgira e quita da quel. Leutier vegnev-an ses affons e lur famiglias da tut temps bugen a casa tiels geniturs, ed eran cheu adina beinvegni. Il 30-9-1982 ei siu mariu spartius da quest mund, e tgei largia quel ha schau anavos san ins s'imaginar. Il novembre 1983 ei la Tina serendida a Tumein tier sia feglia Alfreda. Beinduras visitava ella las famiglias da ses affons, e tuts che prendevan si ella cun cor aviert. Ils 19 da december eis ella stada tier ina sepultura la davosa gada en Tujetsch, ed ins smarvegliava da sia vesladad. Ils 4 da mars ha ina disiddia dil cor surpriu ella, ed ils 9 da mars ha ella priu comiau da quest mund. Aschia ei ina veta spir lavour e benefecis per il carstgaun ida alla fin. Sut numerusa participaziun ei la defuncta vegnida surdada alla fossa sin santeri da sia secunda patria a Cazas ils 13 da mars.

Sper sia fossastattan en malencurada las sis famiglias dils affons cun 19 bia-dis en profunda dolur e tristezia. Mo nus tuts - cun ils ses - savein secon-solar, da saver prender comiau dad in bien carstgaun e d'ina mumma exemplarica. Dieus consoleschi ils ses, e fetschi scalarir ad ella la glisch eterna!